



**Innuttasunik sullissinneq pitsaasoq
Innuttaasut peqqissut
Atuarfiit ingerlalluartut
Ineriartorneq**

**Qeqqata Kommuni
Siumut – Inuit Ataqatigiit – Atassut
Tunngaviusumik suleqatigiinnissamik
isumaqatigiissutaat**

Aallarniut:

Innuttaasut sapingisamik pitsaanerpaamik sullinneqarnissaat kommunillu inuussutissarsiutitigut aningaasarsiornikkullu ineriartortinneqarnissaa suleqatigiit pingaartillugu anguniarpaat. Kommunimilu aningaasarsiornikkut pingaarnarpaatut inissimasup aalisarnerup piniarnerullu ingerlalluarnissaa anguniarlugu kommunip aalisartut piniartullu imminnut qaninnerulernissaat sulissutigineqassaaq.

Suleqatigiit isumaqatigiissutigaaq susasaqartut tamaasa peqatigalugit illoqarfinni nunaqarfinnilu tamani ineriartorneq ammasumik taamatullu saaffiginnittunik sullissilluarnikkut ingerlanneqassaaq.

Tatigeqatigiinneq aallaavigalugu unneqqarissumik pissuseqarluni kiisalu tutsuiginassusilimmik suleqatigiinneq ingerlanneqassaaq.

Innuttaasunik sullissineq:

Suleqatigiit pingaartippaat akisussaaffiit akisussaassusilimmik anguniagalimmillu ingerlanneqarnissaat taamatuttaaq suliniutit anguniakkallu innuttaasunut ammasumik paasititsiniutigineqarnissaat. Tamanna ingerlanneqassaaq qinikkanut amerlanerusunut ataatsimiititalianullu akisussaaffinnik agguataarinikkut. Ilanngullugu innuttaasut pisinnaatitaaffiisa pisortat tungaaniit qaammarsaassutigineqarnissaat sulissutigineqassaaq.

Allaffisorneq:

Suleqatigiit pingaartippaat Qeqqata kommunia tassaassasoq suliffigissallugu pileriginarloq, toqqissisimanarloq aammalu sulisut peqataatinneqartutut tusaaneqartutullu misigisimalernissaannik aqqutissiueqataarusuttoq.

Anguniarneqassaaq Qeqqata Kommuniani tamarmi atukkatigut naligiissaarinerup ingerlaqqinnissaa, inoqarfiit tamarmik qanimut assigiimmillu allaffissorinnikkut sullinneqarnerminnik misigisimanissaat sulissutigineqassaaq.

Kommunimi sulisut piginnaanerisa suliffigissaaneq ilanngullugu qaffassartuarnissaat pingartinneqassaaq aammalu kommunimi sulisut namminneq kajumissutsiminnik inuiaqatigiinni suleqataasut ukiumut ulluni aalajangersimasuni akissarsiaminnik annaasaqaatiginagu unammiartortitsinermi peqataasinnaalernissaat aqqutissiuunneqassaaq.

Allaffissornerup iluani kommunillu susasaqarfiini tamani sutigut aningaasartuutikillisaasoqarsinnaanera misissorneqassaaq.

Aningaasaqarnej - inuussutissarsiornej

Suleqatigiit pingaartippaat Qeqqata kommuniani aningaasatigut akisussaassusilimmik pitsaasumik patajaatsumillu aningaasaqarnerup ingerlanneqarnissaa.

Aningaasarsiornerup ingerlalluarnissaa qulakkeerniarlugu kikkulluunniit piumasaqaatinik naammassinnissimallutik suliffeqarfinnik aningaasarsiorfinnillu sunilluunniit nutaanik pilersitsiniartut kommunimit tamakkiisumik tapersorsorneqarlutillu illersorneqassapput.

Inuussutissarsiornermi ingerlatat nukittorserniarlugit, aalisarnej piniarnerlu ilanngullugit aamma siunnersorteqarnikkut ACB annertusarneqassaaq.

Kommunimilu inuussutissarsiornikkut periarfissat avataaniit ilisimaneqarnerulernissaat anguniarlugu nittarsaassisinerit suliffeqarfinnillu pilersitsisinnaasunik oqaloqatiginninnerit annertusarneqassapput, tassani pinngortitami timersornermik aqqissuussat nunarsuarmioqatitsitsinnik peqataaffigilluarneqarsinnaasut annertusarnissaat/ilisimaneqarnerulernissaat ilanngullugit.

Sisimiut Kangerlussuullu akornganni ATV-inut aqqusinissaq aallartereersoq naammassineqassaaq.

Umiarsualiviit aqqissuussaanerulernissaat aningaasarsiornikkullu iluaqutiginerusinnaanerat anguniarlugu umiarsualiveqarnermut selskab-imik pilersitsisoqassaaq.

Kilisaatit kommunitsinni siunissami usingiartuaannarnissaat anguniarlugu, kilisaataatillit peqatigalugit usingiaanermi pissutsit pitsanngorsarneqassapput.

Kommunitsinni aatsitassarsiorfinnik piumasaqaatinik naammassinnissimallutik aallartitsiniartut tapersorsorneqassapput.

Kommunimi akileraarutip pisariaqartinnagu qaffannginnissaa suleqatigiit sulissutigissavaat.

Aalisarnej-Piniarneq:

Aalisarnerup aningaasarsiornikkut sulisoqarnikkullu pingaarnerpaamik kommunimi inissisimanagera tamakkiisumik illersorneqassaaq.

Kommunip aammalu aalisartut piniartullu qaninnerulernissaat sulissutigineqassaaq aammalu aalisartut piniartullu atugaasa assigiissarnissaat suleqatigiit pingaartippaat, taamaattumik inoqarfinni soorlu piniutaasivinnik, tinutitittarfinnik, assigisaanillu pitsanngorsaatisanik susassaqtut peqatigalugit pilersinneqassapput.

Ukiuunerani umimmanniartarneq eqqarsaatigalugu susassaqtut tamarmik tusaaneqarnissaat inissaqartinneqarnissaallu pingaartinneqassaaq.

Piniagassat sapinngisamik amerlanerpaat aningaasanngortinneqarsinnaanerit anguniarlugu kalaalimineerniarfimmi atortutigut qerititsiviit ilanngullugit pitsanngorsaasoqassaaq.

Kangerlussuarmi sakkutuunngorniat ilinniarfeqalernissaat eqqarsaatigalugulu piniariartarfiit mianerineqarnissaat qulakkeerneqassaaq.

Takornariaqarneq:

Kommunimi suliffeqarfiit innuttaasullu aningaasanik kaaviaartitaqarnerulernissaat anguneqassappat pingaaruteqarpoq avataaniit tikinneqarnerulernissarput.

Kommunimilu ukioq kaajallallugu takornariaqarnikkut ineriartortitsinissamut periarfissagissaarnerput atorluarneqassaaq annertusarneqarlunilu. Tamannalu anguniarlugu timmisartortitseqatigiiffinnik, unnuisarfiliorsinnaasunillu pilersaarinerit oqaloqatiginninnerillu nanginneqassapput.

Nunaqarfiit:

Nunaqarfinnut ataatsimiititaliaq pilersinneqartoq peqatigalugu aammalu nunaqarfiit allaffiini sullissisut piginnaanngorsarnerisigut nunaqarfinni innuttaasunut sullissineq pisariillisarneqarlunilu nukittorserneqassaaq.

Nunaqarfinnut susassaqtitsinerit annertusarniarlugit aningaasaliissutit (konto 18) qaffanneqassapput.

Tulleriiarinikkut nunaqarfinnut tulluurtunik inissialiornerit ingerlanneqassapput aammalu aqqusineqarnikkut pitsanngorsaanerit ingerlanneqassallutik.

Nunaqarfinni qatserutaasiviit illutaat atortullu ullutsinnut naleqqutinngitsut pitsanngorsarneqassapput.

Atugariissaanernej – inunnik isumaginnittoqarfik:

Atugarissaarnermut immikkoortortaqaqarfimmi sullissisut inuttussuseq eqqarsaatigalugu assigiissarneqassapput nukittorsarneqartariaqartullu nukittorsarneqarlutik.

Sullissisut oqilisaanneqarnissaat anguniarlugu aningaasaliissutit iluanni immikkoortortaqaqarfiit pisariaqartitaminik nammineq atorfinitsitsisinaanissaminut pisinnaatitaaffilerneqassapput.

Nukiit anginerusut ilisimasallu avitseqatigiinnikkut annertusarnissaat anguniarlugu immikkoortortaqqat imminnut qanittut kattunnerisigut immikkoortortat anginerusut nukittunerusullu pilersinneqassapput.

Allaffissornikkut pisariillisaanissaq anguniarlugu sulisunut piginnaatitsissutit (kompetenceplan) qaffanneqassapput, taamaalillutik pisariaqanngitsumik innuttaasunik utaqqisitsisarnerit annikillisarneqassallutik.

Ulloq unnuarlu meeqqat angerlarsimaffinnut aningaasartuutit annikillisarnerilugit sapinngisamillu meeqqat angajoqqaatik illoqarfeqatiginissaat anguniarlugu kommuni angerlarsimaffimmik nammineq pigisaminik pilersitsinissaa sulissutigineqassaaq.

Meeqqat angerlarsimaffiup avataanut inissinneqartartut amerliartuinnartut ilaqutariinni paarsisartunut inissinneqartalernikuupput, paarsisartunullu sullissinerup pitsaasuunissaa anguniarlugu paarsisartunik sullissisut nukittorsarneqassapput.

Arnat angerlarsimaffimmi persuttaqaasartut eqqarsaatigalugit, Sisimiuni Maniitsumilu qimarnguinnik illunik pioreersunik pilersitsinissat sulissutigineqassapput.

Suliffissaaleqineq - Inuusuttut unittoqqasut:

Innuttaasut sulisinnaasut tamarmik pisariaqartinneqarput. Taamaattumik arlaatigut pissuteqartumik unittoorsimasut imminnut pilersulernissaat anguniarlugu katsorsaanerit aqqutigalugit suliniarfigineqarneri ingerlaqqissapput.

Inuusuttut meeqqat atuarfiata kingorna suliffeqarfinnut ilinniagaqarfinnullu ingerlariaqqissimanngitsut ilinniagaqalernissaat suliffeqalernissaalluunniit anguniarlugit immikkut annertusisamik suliniarfigineqassapput.

Inuusuttuqqat kivitassagut aallartinneqartartut illoqarfinnut allanut amerlasuut nakkartarput, taamaattoqatitik naapillugit ajornerusumik inuuneqalerneq angusarpaat. Taamaattumik 18-inik ukioqalereeraluartut ulluinnarmik akisussaassuseqalernissaannik anguniarlugu perorsaasulimmik kollegiaqalernissaat misissorneqassaaq.

Innarluutillit:

Tilioq Pissassarfillu qanimut suleqatigalugit innarluutilinnut politikki pingaartinneqarlunilu malinneqassaaq aammalu innarluutillit susassaqarnissaat anguniarlugu kommunip susassaqarfiini sulisorineqarsinnaanerit annertusarneqassaaq.

Innarluutilinnut sullissineq pitsaanerpaaffissaaniitinniarlugu innarluutilinnut sullissisut amerlassusaat sullitaminnut ilumut naapertuunnersut misissorneqassaaq.

Taamatuttaaq tusilartut qitornaasalu pikkorissartuarnissaat sulissutigineqassaaq.

Innarluutillit sunngiffimmini ornitagaqarnissaat qulakkeerneqassaaq.

Utoqqaat:

Utoqqaat utoqqaqatitik ilagalugit sunngiffimmini ornittagqarnissaat qulakkeerneqassaaq.

Utoqqarnut isumaginnittoqarfimmi immikkut aallussisumik ujartuisumillu inunnik isumaginninnermi siunnersorteqarnissaat anguniarneqassaaq.

Utoqqaat piorsarsimassutsitsinnik tammatsaaliinissamik kinguaatsinnut ingerlatitseqqissaat anguniarlugu suleqatiserineqassapput.

Utoqqaat amerliartornerat iluatigalugu inissat malinnaatinneqarnissaat sulissutigineqassaaq, puiguttunngortunut immikkut inissat ilanngullugit. Taamatuttaaq Sisimiuni utoqqaat illuat nutaaq ullutsinnut naleqquttoq sananeqarnissaa aqqutissiuunneqassaaq, tassani Namminersorlutik Oqartussat aningaasaleeqataanissaat anguniarneqassaaq.

Siusinaartumik sulisinnaajunnaarnersiuteqarneq:

Siusinaartumik sulisinnaajunnaarnersiuteqartut inatsisit malillugit sulisinnaanerisa nalilersuivigineqatarnerat nukittorsarneqassaaq.

Siusinaartumik suliunnaarsimasut ulluunerani pioreersunik atorluaanikkut ornittagaqarnissaat aqutissiuunneqassaaq, inuup naleqassusaa aamma sulisinnaajunnaarsimasuni pigineqartariaqarmat.

Sulisinnaajunnaarsimasut timikkut innarluuteqalersimappata timimik nukittorsarnissaannut aalanerulernissamillu siunertalimmik periarfissaat ingerlaqqissapput.

Meeqqat Atuarfiat:

Akuerineqarani atuangitsoortarnerit annikillisarneqarnissaat amerlanerpaallu ilinniagaqarfinnut ingerlariaqqittalernissaat anguniarlugu inuiaqatigiittut meeqqat atuarfiannut ataqqineqarnerulernissarput sulissutigineqaaq.

Atuartut angerlarsimaffimmini inuuniarnikkut ajornartorsiuteqarnertik pillugu atuarfimmi ingerlalluannigitsut ikiorsersinnaanissaat/siumut saatinnissaat anguniarlugit atuarfinni inunnik oqaloqatiginnittartunik atorfinitsitsisoqassaaq.

Meeqqat atuagarsornikkut ajornartorsiuteqartut assassornikkut pikkoriffii tunngavigalugit immikkut sammineqarnissaminnut periarfissinneqassapput.

Atuarfinni akullerni angajullernilu alloriarfinni inuttut ineriartornikkut pisariaqartitsinerup immikkut ittumik sammineqarsinnaanera periarfissiuunneqassaaq, inuttut ineriartornermi tiimit pioreersut atorlugit, ukiup atuarfiusup aallartinnerani ataatsikkut ingerlassinnaangorlugit, pisariaqarpallu atuartut pisariaqartitaat naapertorlugu inuttut ineriartoritsinikkut allatigut ilinniarsimasut atorlugit aqqissuusseqataasinnaangorlugit.

Suleqatigiit isumaqatigiissutigivaat Qeqqata Kommuniani atuarfiit meeqqeriviillu aallaavigalugit ilisimatusarfimmut attaveqaammik "netværk"-mik taallugu pilersitsisoqassasoq, ilisimatusaatigalugu ilinniarnermi periarfissat Qeqqata Kommuniani amerlisarneqarnissaat anguniarlugu, taamatullu ilisimasaniq nutaanik avitseqatigiissinnaaneq aqutissiuunniarlugu.

Meeqqat aasaanerani atuangiffeqartarnerat nammineq kulturitsinnut pilisarnitsinnullu tulluarsarneqassaaq.

Sungiffimmi sammisassat:

Sungiffimmi sammisassat kulturikkullu aqqissuussat innuttaasut nuannaarlutik inuuneqarnissaannut pingaarutilerujussuartut suleqatigiit isumaqarput.

Taamaattumik suliniutit tamakkua meeqqat atuangiffeqarfiini sammisassat ilanngullugit aammalu pinngortitami aasakut ukiukkullu atuinissamut periarfissat ilanngullugit atortutigullu annertusarneqassapput.

Maniitsumi Sisimiunilu inuttussutsimut naleqquttunik naluttarfittaarnissaq sulissutigineqassaaq.

Meeqqat inuusuttuaqqallu ornittagaat ullutsinnut naleqqukkunnaartut nutaanik sananngikkaluarluni, illut pioreersut pigisagut, soorlu atuarfiit sunngiffimmillu ornittakkat (fritidshjem) atorluarlugut nikisiterinikkut aaqqissuunneqassapput.

Kuloturikkut/Perorsarsimassutsikkut pikialaartitsisarneq Qeqqata Kommuniani Illoqarfiit Nunaqarfiit aallartitaqarlutik katerisimaartitsisarnissat anguniarneqassapput.

Timersorneq - Peqqinneq:

Innuttaasut aalanerulernissaat peqqinnarnerusumillu inuuneqalernissaat sulissutigineqaaqqissaaq atuartullu peqqissusaasa misissuivigineqarneranni paasisat aallaavigalugit suliniutit ingerlanneqassallutik.

Qeqqata Kommuniani suleqatigiit pingaartippaat, susassaqtut akimortumik suleqatigiisillugit pinaveersaartitsinerup ingerlanneqartarnissaa. Ajornartorsiutit piusut aallaavigalugit suleqatigiisit suliniutinik ingerlatsinikkut iliuseqartarnissaat anguniarneqassaaq, siusinaartumillu pinaveersaartitsineq eqqumaffigineqassalluni.

Innuttaasut ilaqutariillu peqqinnarnerusumik inuuneqalernissaat anguniarlugu tarnikkut peqqissuunissaq ilanngullugu, pinngortitami periarfissat atorluarneqassapput, tassani unnuisarfinnik timersornermi annertuunik aaqqissuussinerni aammalu atuartut ilaqutariillu pisariaqartitsisut tammaarsimaarfigisinnaasaannik pilersitsinissaq ilanngullugu sulissutigineqassaaq.

Timersoqatigiit Kattuffiat suleqatigalugu namminneq kajumissutsiminnik suliaqartut peqatigiiffilerinermik sungiusaanermillu ataavartumik pikkorissarneqartarnissaat qulakkeerneqassaaq.

Qeqqata Kommuniani innuttaasut imminnut ilisareqatigiillutillu qanilaanerulernissaat anguniarlugu Qeqqata Kommuniani unammersuaaqatigiittarneq (Kommune mesterskab) ammaanneqassaaq, illoqarfinnilu marluusuni aaqqissuussisarneq tulleriissaartumik ingerlanneqartalissalluni.

Angorusupparput kommunimi innuttaasut tassaassasut nunatsinni tupamik imigassamik, ikiaroortartumillu nunatsinni atuinnginnerpaasut.

Meerartattalu pujortartunik isigisaat annikillisarniarlugu 1.maj 2022 aallarnerfigalugu kommunip suliffeqarfiini tamani sulinerup nalaani pujortarneq inerteqqutaalissaaq. Tassungalu atatillugu sulisut pujortarunnaarnissaminnut sakkussaannik ikiorneqassapput.

Meeqqeriveqarneq:

Suleqatigiit pingaartippaat meeqqat peqqissuunissaat aammalu meeqqat tamarmik meeqqerivinni inissaqartinneqarnissaata qulakkeersimanissaa.

Meeqqat angerlarsimaffimmini ajornartorsiuteqartut siusinnerusukkut ikiorserneqarsinnaalernissaat anguniarlugu oqaloqatiginnittartunik/inunnik sullissisunik ikiorneqartarnissaat sulissutigineqassaaq.

Meeqqerivinniittuutitaqarnermi akigitat sapinngisamik qummut killilerneqarsimanerat, tassalu annerpaamik kr. 1.000,- periarfissaatillugu sapinngisamik inissisimatineqassaaq, kiisalu aningaasarsiakinnerpaanut minnerpaaffianiitineqassaaq.

Suleqatigiit isumaqatigiipput meeqqerivinni nerisaqartitsinerup pitsaanerpaaffianiitittuaannarnissaa qulakkeerniarlugu susassaqtut angajoqqaallu peqatigalugit ataavartumik nalilersuisoqartassasoq.

Meeqqerivinni perorsaasut naammattut pigilernissaat sulissutigalugu periarfissarsiortuarnissaaq suleqatigiit pingaartippaat, taamaattumik najugaq qimannagu perorsaasunngorniartarnerup Namminersorlutik Oqartussaniit unitsinneqannginnissaa kaammattuutigineqassaaq.

Teknikkimut tunngasut:

Inuussutissarsiutinik nutaanik pilersitsinissaaq ineriartornissarlu eqqarsaatigalugit ukiunut amerlasuunut siumut pilersaarusiortoqassaaq.

Suleqatigiit pingaartippaat ineriartornerup sanaartornerullu ataavartumik ingerlanneqarnissaat, taamaattumik nutaanik sanaartorniarlutik qinnuteqartut sukkanerusumik sullinneqarsinnaalernissaat anguniarlugu sullissisut amerlineqassapput sanaartorfigissaanerillu naammattumik ingerlanneqassallutik.

Suleqatigiit siunissaq qaamasutut isigalugu inerisaarusussuseqarlutillu Maniitsup ineriartornissaa eqqarsaatigalugu, Ujaqquerivimmiit aallartittumik Narsarsuup tungaanut ingerlasumik ilummut aqquserngup ilaneqarnissaa anguniarlugu nunniorneqarnissaaq.

Kommunip suliffeqarfiutaani mingutsitsinngitsumik ataavartunik nukissiuteqarnerup siuarsaavigneqarnissaa, soorlu ilaatigut seqerngup qinngorneranik innaallagissiuutit atornerqarnerulernissaat sulissutigineqassaaq.

Upalungaarsimaneq:

Upalungaarsimanermik qatserisartoqarnermillu sullissisut pikkorissartuarnissaat aqqutissiuunneqassaaq atortutigullu ullutsinnut naleqquttunik nutarsaajuarnissaaq sapinngisamik ingerlanneqassaaq.

Nunatsinni qatserisartunngorniat pikkorissarnerillu kommunitssinni ingerlanneqartarnissaat anguniarlugu illutatigut sulisutigullu pitsanngorsaanerit ingerlanneqassapput.

Ineqarneq:

Innuttaasut toqqissisimasumik inuuneqarnissaannut angerlarsimaffik pingaaruteqarnerpaavoq. Taamaattumik innuttaasut pitsaasunik ullutsinnullu naleqquttunik angerlarsimaffeqarnissaat suleqatigiit pingaartillugu qulakkeersimaniassavaat.

Namminersorlutik Oqartussat inissiaataasa kommuninut tunniunneqarnissaat sulissutigineqaqqissaaq, taamaalilluni aningaasat Namminersorlutik Oqartussaniit malinnaatinneqartut atorlugit ukiut tamaasa inissialiornernut ingutserinissamullu aningaasaliisarnissat sulissutigineqassapput. Tassungalugu INI A/S-ip Sisimiuniiginnarnissaa sukataarutigineqassaaq.

Namminersorlutik Oqartussanut saaffiginnissutissat:

- Maniitsumi erngup nukinganik nukissiorfiliornissap salliutinneqarnissaa.
- Taseriap kuussuata erngup nukiliorfigineqarneragut aningaasarsiorfinnut nutaanut atornerqarsinnaalernissaa anguniarlugu pilerisaarutigineqarnissaa.
- Maniitsumi efterskolep ullutsinnut naleqqukkunnaartup saaffiginnissutigineqarnissaa.
- Sisimiuniit Kangerlussuarmut aqqusinissap Namminersorlutik Oqartussaniit aningaasaliiffigineqarnissaa Kangerlussuullu ineriartortinneqarnissaa.

- Nunaannarmi nunaminertanik aqutsinerup kommuninit aqunneqalernissaa, soorlu ukiukkut umimimmanniartarnermut koncessioninullu tunngasut.
- Saviminilerinermik Ilinniarfiup Sisimiunut nuunneqarnissaata qulakkeernissaa.
- Kangerlussuarmi Kangaamiunilu nutaamik talittarfiliornissaq.
- Ikiaroorartumik eqqussuinerup pinaveersaartinnissaa anguniarlugu Sisimiuni Maniitsumilu ilanngaaserisoqalernissaa.
- Visitorcenterit kommunimi pilersinneqarnissaat.
- Qajartortartut kattuffiata qajartorneq qaanniornerlu pillugit Maniitsumi ilinniarfeqalernissaanik anguniagaata saaffiginnissutiginissaa.
- Tunitsiviit ulikkaaqqasarneri pissutigalugit aalisartut tunisisinnaasannginneri ilungersunartutut isigalugu pitsanngorsaansaat pillugit saaffiginninnissaq.

Naggasiineq:

Anguniakkat soorunami aningaasaqarneq eqqarsaatigalugu tulleriissarinikkut sulissutigineqassapput aammalu isumaqatigiissutip anguniakkallu anguneqarnissaat qulakkeerniarlugit nalilersortarnissaat killiffissiortarnissaallu pillugit oqaloqatigiinnerit ingerlanneqartassapput.

Suleqatigiit Siumut / Inuit Ataqatigiit / Parti Naleraq isumaqatigiissutaat atsioqatigiinnikkut atuutilissaaq.

Sisimiut 23.april 2021

Siumut:

Evelyn Frederiksen

Inuit Ataqatigiit:

Juliane Enoksen

Atassut:

Anna Karen Hoffman
